

ՀԱՎԵԼՎԱԾ

«Երևանի պետական համալսարան»
հիմնադրամի գիտական խորհրդի
2023 թ. փետրվարի 9-ի թիվ 6/9
որոշման

ԵՊՀ գիտական խորհրդի նախագահ
Հ. Վ. Հովհաննիսյան

ԿԱՐԳ

**«ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆ» ՀԻՄՆԱԴՐԱՄԻ
ՍԹԵՄ ԴՊՐՈՑԻ ԸՆԴՈՒՆԵԼՈՒԹՅԱՆ, ՏԵՂԱՓՈԽՄԱՆ ՈՒ ԱԶԱՏՄԱՆ**

1. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով սահմանվում են «Երևանի պետական համալսարանի հիմնադրամի «ՍԹԵՄ դպրոց» կառուցվածքային ստորաբաժանման (այսուհետ՝ դպրոց) սովորողների ընդունելության, տեղափոխման ու ազատման կարգը:

2. Սույն կարգում կիրառվող հասկացություններն են՝

1) **ընդունող հանձնաժողով** – ԵՊՀ ռեկտորի հրամանով ձևավորված, դպրոցի ընդունելության կազմակերպման ու դրա արդյունքների վերաբերյալ վերջնական որոշում կայացնող կոլեգիալ մարմին,

2) **ծնող** – դիմորդի/աշակերտի ծնողները և/կամ ծնողը, օրինական ներկայացուցիչները և/կամ ներկայացուցիչը,

3) **դիմորդ** – դպրոց ընդունվելու համար դիմող ու ընդունելության գործընթացի փուլերին մասնակցող անձ,

4) **քննություն** – սահմանված ժամանակահատվածում, մրցութային հիմունքներով անցկացվող առարկայական գիտելիքի ստուգում ու գնահատում,

5) **ընդհանուր իմացության գիտելիքի ստուգում** – առանց գնահատման, բանավոր հարցազրույցի միջոցով հանրակրթության միջնակարգ մակարդակի առարկայական գիտելիքի ու տրամաբանության ստուգում:

2. ՍՈՎՈՐՈՂԻ ԸՆԴՈՒՆԵԼՈՒԹՅՈՒՆՆ ՈՒ ՏԵՂԱՓՈԽՈՒԹՅՈՒՆԸ

3. Դպրոցի ավագ (10-12-րդ) դասարաններ ընդունելությունն իրականացվում է չորս ձևով՝

1) հիմնական կամ ընդհանուր ընդունելություն,

2) լրացուցիչ (թափուր տեղերի դեպքում) ընդունելություն,

3) հատուկ ընդունելություն, որը կազմակերպվում է ըստ անհրաժեշտության ԵՊՀ գիտական խորհրդի որոշմամբ,

4) արտոնությամբ ընդունելություն, որը կազմակերպվում է հանրապետական առարկայական օլիմպիադաների մրցանակակիրների ու միջազգային առարկայական օլիմպիադաների մասնակիցների համար:

4. Դպրոց ընդունվելու համար կարող են դիմել ՀՀ և օտարերկրյա քաղաքացի դիմորդներ:

5. Ընդունելությունը դպրոց իրականացվում է՝ բնագիտական մեկ առարկայից պարտադիր գրավոր քննություն հանձնելով ու ընդհանուր իմացության գիտելիքի ստուգման հարցազրույցին մասնակցելով: Սույն կարգի 3-րդ կետի 4-րդ ենթակետով սահմանված արտոնության առկայության դեպքում ընդունելությունն իրականացվում է առանց քննության:

6. Դպրոցի ընդունելությանը մասնակցելու համար դիմորդի ծնողը էլեկտրոնային կամ թղթային եղանակով դպրոց ներկայացնում է.

1) դիմում՝ ԵՊՀ ռեկտորի անունով,

2) 3*4 չափսի 1 լուսանկար,

3) դիմորդի ծննդյան վկայականի կամ անձնագրի պատճենը (առկայության դեպքում),

4) դպրոցից դպրոց սովորողի տեղափոխման տեղեկանքը,

5) հիմնական կրթության վկայականի բնօրինակը՝ օտարերկրյա դիմորդների (պարտադիր) համար, իսկ ՀՀ-ում սովորող դիմորդների դեպքում՝ տեղեկանք մինչև ավարտական ատեստատի ներկայացումը:

7. Դպրոցի ընդունելությունը մեկնարկում է յուրաքանչյուր ուսումնական տարվան նախորդող մարտ-մայիս ամիսներին:

8. Դպրոցը յուրաքանչյուր տարվա ընդունելության մեկնարկի մասին տեղեկատվությունը ընդունելությունից առնվազն 2 ամիս առաջ հրապարակում է դպրոցի կայքում ու տեղեկատվական հարթակներում (սոցիալական ցանցեր, զանգվածային լրատվական միջոցներ)՝ բացառությամբ առաջին անգամ կազմակերպվող ընդունելության:

9. 2023-2024 ուսումնական տարվա համար ընդունելությունը կատարվում է 10-րդ և 11-րդ դասարանների սովորողների համար:

10. Յուրաքանչյուր տարվա ընդունելությունից մեկ կամ երկու ամիս առաջ դպրոցը կազմակերպում է բաց դռների օրեր դիմորդների ու նրանց ծնողների համար՝ դպրոցի ենթակառուցվածքներին, կրթական ծրագրերին ու ուսուցման մեթոդներին ծանոթացնելու նպատակով:

11. Դպրոց ընդունելությունն իրականացվում է հետևյալ ընթացակարգով՝

1) 6-րդ կետով պահանջվող փաստաթղթերի ընդունում,

2) **գրավոր քննության անցկացում** (գրավոր քննության քննական հարցաշարերը կազմվում են հանրակրթության միջնակարգ մակարդակի առարկաների ծրագրերի հիման վրա),

3) ընդհանուր իմացության գիտելիքների ստուգում:

12. Դպրոց ընդունվելու համար դիմորդները, ըստ նախընտրության, հանձնում են մեկ պարտադիր քննություն՝ «Մաթեմատիկա», «Ֆիզիկա», «Քիմիա» կամ «Կենսաբանություն» առարկաներից որևէ մեկը (բացառությամբ սույն կարգի 3-րդ կետի 4-րդ ենթակետով սահմանված դեպքերի):

13. Գրավոր քննության արդյունքներն հրապարակվում են դպրոցի կայքում քննությունների անցկացումից 3 աշխատանքային օրվա ընթացքում, ինչպես նաև ուղարկվում դիմորդների կամ նրանց ծնողների կողմից տրամադրված էլեկտրոնային փոստի հասցեներին:

14. Գրավոր քննությունների արդյունքները կարող են բողոքարկվել հրապարակումից հետո՝ 48 ժամվա ընթացքում՝ թղթային կամ էլեկտրոնային ձևով գրավոր դիմում գրելով ընդունող հանձնաժողովի նախագահին:

15. Դիմում-բողոքների վերաբերյալ պատասխաններն ուղարկվում են բողոքարկող անձի էլեկտրոնային փոստին կամ հանձնվում են առձեռն: Բողոքարկման արդյունքում դիմորդների ստացած միավորները կարող են վերանայվել կամ չվերանայվել: Գնահատումն իրականացվում է 20-միավորանոց/բալանոց համակարգով,

16. **Ընդունելության արդյունքների ամփոփում ու հրապարակում.** լիցենզիայով հատկացված տեղերի սահմաններում քննության հավաքած միավորի ու հարցազրույցի արդյունքների հիման վրա ընդունող հանձնաժողովը որոշում է կայացնում ընդունված դիմորդների ցուցակի վերաբերյալ: Ընդունող հանձնաժողովի որոշումը վերջնական է և բողոքարկման ենթակա չէ:

17. Դպրոցից այլ դպրոց տեղափոխումը կատարվում է սովորողի ծնողի դիմումի հիման վրա:

3. ԸՆԴՈՒՆՈՂ ՀԱՆՁՆԱԺՈՂՈՎԸ

18. Դպրոցի ընդունող հանձնաժողովը (այսուհետ՝ ԸՀ) բաղկացած է առնվազն 5, առավելագույնը՝ 9 անդամից: ԸՀ-ն ունի նախագահ:

19. ԸՀ-ն ձևավորվում է, և նրա անհատական կազմը հաստատվում է ԵՊՀ ռեկտորի հրամանով:

20. ԸՀ անդամներ կարող են լինել ԵՊՀ պրոֆեսորադասախոսական կազմի, դպրոցի տնօրենության ներկայացուցիչները, ուսուցչական կազմի անդամները, դպրոցի տնօրենի կողմից հրավիրված մասնագետները:

21. ԸՀ յուրաքանչյուր անդամ ունի մեկ ձայնի իրավունք:

22. ԸՀ բոլոր անդամների հետ կնքվում է «Գաղտնիության պարտավորագիր»՝ ապահովելու ընդունելության գործընթացի գաղտնիությունը:

23. ԸՀ անդամների աշխատանքը վճարովի է. վճարումը կատարվում է ԵՊՀ ռեկտորի հրամանով սահմանված կարգով:

4. ՊԱՅՄԱՆԱԳՐԻ ԿՆՔՈՒՄ ՈՒ ՖԻՆԱՆՍԱԿԱՆ ԱԶԱԿՑՈՒԹՅՈՒՆ

24. Ընդունող հանձնաժողովի որոշման հիման վրա ԵՊՀ ռեկտորը հրամանագրում է աշակերտներին: Հրամանագրելուց հետո ԵՊՀ-ի ու աշակերտի ծնողի միջև կնքվում է «Ուսումնառության մասին» պայմանագիր: «Ուսումնառության մասին» պայմանագիրը կնքվում է 1-3 տարի ժամկետով:

25. Դպրոցում սովորող աշակերտներն ունեն ֆինանսական աջակցություն ստանալու իրավունք:

26. ԵՊՀ-ն նպաստի ձևով ֆինանսական աջակցություն տրամադրում է սոցիալապես անապահով ընտանիքների աշակերտներին:

27. Ուսումնառության բարձր առաջադիմության դեպքում աշակերտին տրամադրվում է ուսումնական կրթաթոշակ ռոտացիայի հիման վրա: Յուրաքանչյուր տարի որոշվում են կրթաթոշակի տեղերը՝ ըստ դասարանների:

28. Ֆինանսական աջակցությունը սահմանվում է մեկ ուսումնական տարվա համար և տրամադրվում ԵՊՀ ֆինանսական միջոցների հաշվին:

29. Սոցիալական աջակցության դիմումներն ընդունվում են ուսումնական տարվա յուրաքանչյուր տարվա պարապմունքների սկզբին նախորդող 2 շաբաթների ընթացքում:

5. ՍՈՎՈՐՈՂԻ ԱԶԱՏՈՒՄԸ

30. Դպրոցից սովորողի ազատումը կատարվում է՝

- 1) ծնողի դիմումի հիման վրա,
- 2) դատարանի՝ օրինական ուժի մեջ մտած դատավճռի հիման վրա,
- 3) ուսման վարձը չվճարելու հետևանքով,
- 4) ոչ բավարար առաջադիմության դեպքում,
- 5) «Ուսումնառության մասին» պայմանագրի, դպրոցի էթիկայի ու վարքագծի, ներքին կարգապահական կանոնները, իրավական այլ կարգեր պարբերաբար ու կոպտորեն խախտելու դեպքում:

6. ԵԶՐԱՓԱԿԻՉ ԴՐՈՒՅԹՆԵՐ

31. Հայաստանի Հանրապետությունում գործող հանրակրթական ուսումնական հաստատություններից դպրոց ընդունելությունը կատարվում է վկայականի կամ դպրոցի կողմից տրված տեղեկանքի հիման վրա: 2022-2023 ուսումնական տարվա 9-րդ դասարանի աշակերտները կարող են դիմել դպրոց 2023-2024 ուսումնական տարվա 10-րդ, իսկ 10-րդ դասարանի աշակերտները՝ 11-րդ դասարան ընդունվելու համար:

32. Օտարերկրյա քաղաքացի, 12-ամյա կրթությամբ դպրոցներից 9-րդ դասարանը ավարտած աշակերտները առնվազն հիմնական կրթության վկայականի առկայության

դեպքում կարող են դիմել 2023-2024 ուսումնական տարվա 10-րդ, իսկ 10-րդ դասարանի աշակերտները՝ 11-րդ դասարան ընդունվելու համար: